

lam, splendore suo signum in illius pectore collustrantem, LAKSHMIS speculum lusorium.

11. Brachiis suis, ramis similibus, divinisque ornamentis distinctis, apparebat ille in aquarum medio, velut alter *Párijátas*.

12. Victoriæ clamores edebantur a telis animatis, quæ gaudii colorem de genis *Daityorum* mulierum evanescere fecerant.

13. Adstitit ei, junctis unguibus, modestus GARUDAS, fulminis ictibus notatus, odio in SESHAM relicto.

14. Oculis suis purgantibus, devotionis somno finito lucentibus, BHRIGUI reliquisque vatibus, num bene dormisset interrogantibus, benigne arrisit.

15. Tum dei, inclinato corpore salutantes *Asurorum* victorem, celebrabant celebrandum illum, neque verbis nec mente comprehendendum.

16. “ Salve, universi creator primo, deinde universi conservator, denique
“ universi deletor, ita trifariam divisus.

17. “ Veluti aqua cœlestis, quæ unum tantum gustum habet, hic vel
“ illic alias gustus assumit, sic tu, ipse immutabilis, in diversis qualitatibus
“ diversos status assumis.

18. “ Tu es immensus, mundum metiens; cupidinis expers, cupidinem
“ impertiens; invictus, victor; prorsus indistinctus, rerum distinctarum
“ auctor.

19. “ Ipse uniformis, ob causam aliquam hunc vel illum statum induis;
“ varietas tua eadem esse memoratur, ac crystalli varietas, colore adjecto
“ orta.

20. “ Sciunt te homines in corde commorantem, nec tamen propinquum;
“ desiderii expertem, et tamen castigationes subeuntem; misericordem,
“ nulla miseria tactum; antiquum, haud senescentem.

21. “ Omniscius es, non cognitus; omnium rerum auctor, per te ipsum
“ existens; omnium moderator, nulli domino subjectus; tu es unus,
“ omnes species induens.

22. “ Pronuntiant te septem hymnis laudatum, in septem marium undis
“ dormientem, cujus os est ignis, septem flammis splendens, septem mun-
“ dorum unicum refugium.